



大清穆宗繼天開運受中居正保大定功聖智誠孝信敏恭寬
毅皇帝實錄卷之二百三

同治六年丁卯五月癸亥諭軍機大臣等兆琛奏官軍各路
獲勝並布置楚防情形一摺兆琛一軍自躡平寨頭附近各
寨後將清江援賊及另股攻圍馬鬣嶺民屯苗逆分路擊退
並將燕溝洞等處賊壘攻克其撲犯長吉等處賊匪復疊被
官軍擊敗李元度一軍亦進徧荆竹園老巢屢挫賊鋒並攻
克招降河西各寨周洪印一軍將竄擾靖城附近地方苗匪
擊敗分扼邊隘辦理均尚得手著兆琛督飭諸軍分路防剿
並令李元度先將河西肅清以便併力攻拔荆竹園老巢疏

通黔省東路。張亮基亦當派兵由上游而下。與楚軍會合夾擊。以期迅掃妖氛。並著劉崑將沅晃靖一帶要隘嚴防。以固楚省腹地。仍遵奉前旨。飭令席寶田速募楚勇成軍。前往黔疆接替兆琛。將此由五百里諭知劉崑。張亮基。並傳諭兆琛知之。○綏遠城將軍福興等奏。請將採辦軍駝及辦理北路軍餉出力各員獎敘。得旨。興奎等採辦駝隻等事。均係分所應辦。何得率請獎敘。著不准行。○補鑄阿勒楚喀正黃旗佐領。管倉監督。拉林右司協領。正白鑲白兩旗佐領。江甯駐防八旗佐領。各關防圖記。從將軍富明阿。魁玉請也。○予貴州寨頭陣亡參將王華廷等十七員祭葬世職加等。○予貴州

清溪等處被戕知州何琳等祭葬世職。○甲子。諭內閣。裕瑞奏。請將私徵把持之牧羣各員分別懲辦。並將動用裁汰各款。開單呈覽一摺。據稱牛羊羣左翼遊牧。內有鹼池六處。其產鹼係該羣眾蒙古人等埽收。設有官商承售。道光年間。奏定鹼價銀數。咸豐二年。因兩淮息銀不能徵解。將向來私徵銀兩。提為辦公。自九年抽起。至今均無異詞。去冬牛羊羣副總管扎克都爾聲稱。鬻鹼眾人呈請免抽。當派員外郎惠昌前往詳查。實係該處各官員謀利把持。其蒙古人具呈等情。並無其事。現經究訊明確。請旨將副總管等官分別革職議處等語。此案牛羊羣左翼副總管扎克都爾。膽敢私徵罔利。

實錄卷三十三
二
擅詞嘗試。實屬有玷官箴。扎克都爾著卽行革職。其通同謀利之固山達察克都爾扎普齊巴克扎普委固山達曼達濟爾胡德沁彭蘇克索諾木多爾濟巴圖鄂齊爾額外委固山達阿爾塔什迪布彥德勒格爾等八員均著一併革職。牧長泳隆默濟格僧額托果齊察罕布彥達米林瑪哈濟爾迪巴圖克什克瑪哈巴勒阿爾薩朗巴朗濟里克多普端鄂勒哲依多普端等十三員亦著卽行革職。牛羊羣總管達米林扎普於所管轄之事並不先行揭報著交部議處。印房直年主事文榮於未經奏明之項任意開銷亦著交部議處。印房直年筆帖式祥祿蒙古翼驍騎校庫穆吉泰隨同附和著一併

交部議處。貼寫筆帖式阿拉普散貼寫鄂齊爾巴圖均著卽行斥革。此項驗價試辦已有起色。茲復據該都統等奏稱眾所樂從自應照舊抽收以資辦公。該都統等務當嚴飭經手各員認真承辦。如查有從前情弊卽著隨時查叅。並著妥議章程。徧行曉諭。以杜侵漁。其單開之報銷各款及裁減各條尚屬周妥均著照所請行。○以大理寺少卿王維珍為福建鄉試正考官。翰林院侍讀學士鄂芳為副考官。內閣學士銘安為廣東鄉試正考官。翰林院侍讀學士馬恩溥為副考官。侍講學士錢寶廉為廣西鄉試正考官。掌山西道御史王師曾為副考官。○乙丑遣官祭

關帝廟。○諭軍機大臣等。富明阿等奏。遵旨安插究金流民。藐法不逞之徒。派兵夾擊。改設守山卡倫各一摺。葦沙河金夫。其安分畏法者。經協領那斯洪阿等親率該佃民。均赴木齊河樺樹林子一帶安插。撥給地二千三百餘晌。所撥之地。過三年後另行追繳。游民私墾盜種地三千九百餘晌。一併歸入節年開荒案內。報部作正支銷。均著照所請行。富明阿等於此項各事宜。務當實心經理。毋得有名無實。致令別滋事端。其甯古塔琿春謀逆之匪。現俱零星散匿。並著富明阿等檄飭派出官兵嚴密搜捕。務絕根株。此次那斯洪阿等隨帶之筆帖式等。准其於彙保案內擇尤請獎。毋許冒濫。該將

軍等以今昔形勢不同。擬將守山卡倫擇要改設。卽著照所議妥為辦理。圖留覽。將此各諭令知之。○又諭李鴻章奏。擒股由南陽奔竄東北。勢將由汴入東。現調各軍追剿。李鶴年奏。賊竄新鄭東北。省防河防喫重。各一摺。賊由鄧州唐泌等處奔竄。劉銘傳周盛波等追擊。各獲勝仗。該逆近徧許州。復經李鶴年派張曜出隊攔擊。現由洧川尉氏竄中牟一帶。據擒獲賊供。賴李兩逆。本圖竄陝。因鄆城梁山寨有土匪勾引。欲速赴東裝旗。李鴻章現令劉銘傳一軍屯紮曹單。察度合圍。刻下河水乾涸。礮船無所施展。著李鴻章督飭潘鼎新緊躡賊蹤。與運防水陸各營。妥籌策應。丁寶楨諒已到防。著卽

實錄卷三十三
四
將鄒滕等處速籌布置。鄆城土匪著派兵先事查拏。以免句
結為患。江境運河亦涸。恐賊乘虛下竄。著曾國藩令黃翼升
迅率礮船馳赴清江徐州一帶。會督水陸各軍。嚴密巡防。以
期有備無患。李鴻章仍當催令沈宏富。劉秉璋等。相機進發。
力圖制勝。該大臣應赴何路調度。卽行酌度移營。不為遙制。
賊蹤現在中鄭。其地濱臨黃河。逼近省會。李鶴年已令宋慶
跟勦。令張曜由洧尉一路繞出賊前。悉力扼截。均尚妥協。著
卽督飭諸軍認真遏截。痛挫兇鋒。省城防務著督飭藩臬兩
司妥為經理。不可稍涉大意。開東去賊不遠。著劉長佑催令
張樹聲趕緊赴大名一帶督辦防務。該督撫等均須振刷精

神力籌堵禦之方。儻任滋擾完善。惟該督撫等是問。將此由
六百里各諭令知之。○丙寅諭內閣。本年春夏以來。雨澤愆
期。久形亢旱。疊經降旨祈禱。雖經得雨。尚未深透。現在節近
夏至。農田望澤彌殷。睹茲風燥日炎。殊深憂懼。因思在京問
刑各衙門。往往於現審案件。延宕時日。未能清結。以致無辜
被累之人。久羈囹圄。湮鬱莫伸。因而斃命。實足以傷天和。著
刑部步軍統領順天府各衙門。將現辦各案。趕緊清釐。如有
待質應訊之人。飭司坊各官取保後。迅速傳訊。次第結案。不
准稍有積壓拖累。以消災沴而迓和甘。○諭軍機大臣等。龐
鍾璐奏。豫籌荒政。並陳管見十條一摺。直隸為畿輔重地。正

定以南。雖形亢旱。而春間曾得雪澤。農田尚可播種。自保定以北。冬雪既少。近來日炎風燥。朕屢虔誠祈禱。尚未渥沛甘霖。焦灼之懷。形諸寤寐。龐鍾璐所陳救荒之策。自宜及早綢繆。免致小民失所。著萬青藜。胡肇智。劉長佑。體察情形。或開倉出糶。或以工代賑。或多設粥廠。或勸捐接濟。卽著妥籌奏聞。務使小民得有實惠。不至轉死溝壑。以副視民如傷之隱原。摺單均著鈔給閱看。將此各諭令知之。○以正白旗蒙古都統官文署鑲白旗蒙古都統。○丁卯。諭內閣。前因已故額駙。奈曼郡王德木楚克。扎布之侍妾等。呈控新襲郡王薩哈拉。倚仗王勢。安心陷害等情。當派肅親王華豐。尚書寶璽會

同刑部秉公審訊。茲據奏稱。傳集人證。取具供詞。片行理藩院轉飭薩哈拉據實登覆。乃薩哈拉前後所遞供詞。兩歧。自相矛盾。請飭傳訊等語。奈曼郡王薩哈拉。於案內訊出各節。呈遞親供。既屬前後兩歧。自非當面質訊。難成信讞。薩哈拉著先行開去御前行走差使。聽候傳訊。尋華豐等奏。遵查薩哈拉未能贍養父妾。致啟爭端。本有不合。惟訊無倚勢陷害別情。且到案卽據供稱。願將產業分給養贍。情尚可原。請免置議。至前後供詞。本有歧異之處。理藩院司員齡昌。於譯漢時。刪去二字。係屬誤會。無關弊竇。業經該衙門奏參議處。應免傳訊。從之。○諭軍機大臣等。丁寶楨奏。捻股竄入東境。力

籌防勦一摺。捻蹤剽疾異常。已由考城晝夜潛奔。竄至曹州及鄆鉅境內。志在搶渡運河。圖擾東府。現在運河水勢淺狹。情形喫重。著丁寶楨督飭現有兵勇。嚴密扼守隄牆。毋任竄越。南陽湖水乾涸。新店新廬及谷亭一帶防務更為緊要。丁寶楨雖經分調陳錫周等各營分紮。仍慮兵力單薄。著李鴻章迅檄劉銘傳。潘鼎新等軍。星夜兼程。馳援東境。毋稍延緩。黃河水勢雖漲。防堵不可不密。著劉長佑。丁寶楨。李鶴年。各飭水陸文武嚴密巡防。不可稍涉大意。蘇廷魁亦當督率河標兵弁一體助守。毋得置身事外。將此由六百里各諭令知之。○又諭張凱嵩奏慶遠官軍越境攻克苗寨。收復荔波縣

城一摺。此次慶遠官軍擊敗黔苗。乘勝進攻荔波。收復縣城。勦辦尚屬奮勉。其尤為出力將弁。著張凱嵩酌保數員。以示獎勵。毋稍冒濫。粵軍遠駐黔境。糧運難繼。自係實情。張亮基責任封圻。既不能派兵會勦。迨客軍越境收復。又復置之不問。疆臣職守之謂何。著卽抽調勁旅。赴荔夾勦。妥籌善後。不得以兵單餉絀。徒知諉過於人。巧為掩飾。吳昌壽計日當可到任。並著嚴飭各軍無分畛域。總以地方為重。不可稍有推諉。該督撫等功罪所在。朝廷自能洞鑒也。勉之。將此由五百里諭知張凱嵩。張亮基。並傳諭吳昌壽知之。○江西巡撫劉坤一奏。拏獲義甯州起事紅蓮教匪首李觀芬等。得旨。著卽

督飭地方文武各官迅速按捕。不准一名漏網。並著兩湖督撫一體嚴密緝拏。務期悉數就擒。盡法懲治。以絕根株。○署湖廣總督譚廷襄奏。挑選綠營精壯官兵。仿照直隸章程。紮營教練。得旨。著咨明李瀚章認真訓練。不准日久生懈。以期悉成勁旅。○陝西巡撫喬松年奏。軍務未靖。請將補行壬戌甲子及本年鄉試。仍展限舉行。從之。○以鑲藍旗滿洲護軍參領璟德為正紅旗漢軍副都統。○以原任西安將軍多隆阿捐輸軍餉。永廣順天鄉試滿洲蒙古中額一名。京旗滿洲蒙古學額十名。○予陝西軍營病故正紅旗漢軍副都統塔爾巴哈台參贊大臣德興阿祭葬卹廕加等。謚威恪。○予江

西各屬陣亡殉難附生吳際隆等紳民婦女八百二十八名。口分別旌卹如例。○戊辰。諭內閣。候補內閣侍讀學士鍾佩賢奏。亢旱日久。請飭廷臣直言極諫。以資修省一摺。本年自春徂夏。雨澤愆期。屢經設壇祈禱。昨又降旨清理庶獄。連日陰雲密布。尚未渥沛甘霖。自係朝廷敷政未能悉當。著在廷滿漢言事諸臣。於時政得失。盡心獻替。毋循故常。毋避忌諱。期於國計民生。兩有裨益。至摺內所稱。夏同善諫幸悖親王府。諭旨稱循舊章以折之。倭仁諫設同文館。諭旨令酌保數人。另立一館以難之等語。似該員於此二事。尚未深悉。溯查從前詣近支王等府第。

寶鑑卷三十三
神殿前行禮事非一次。本有成案可循。初非創為此說。以折夏同善也。朝廷於夏同善所陳風聞傳集梨園之事。惇親王並未奏聞。經該員陳奏。立降諭旨撤去。何嘗不虛懷納諫。至倭仁請罷同文館招考天文算學一摺。朝廷亦因摺內有天下之大不患無才之語。或者該大學士確有所知。故令酌保數員。擇地設館。嗣因倭仁奏意中並無其人。不敢妄保。卽諭以隨時諮訪。並未強其所難。至倭仁所奏亦係因公起見。惟於總理各國事務衙門籌辦情形。未能詳悉。故特派令在該衙門行走。俾互相斟酌。共濟時艱。倭仁於拜命後。旋因病請假。並請開缺。屢次賞假調理。冀其趕緊就痊。用資倚畀。豈有以

此難之之理。總之臣工有所敷陳。必當詳覈事實。方能於事有濟。固不可苟為容悅。緘默自安。亦不得見好沽名。藉端嘗試。爾大小臣工。嗣後務當精白乃心。共圖匡弼。以期君臣交儆。感召

天和。實有厚望焉。鍾佩賢另片奏。宮廷費用稍廣。傳取稍多。較前數年增至一倍等語。著總管內務府大臣隨時查覈一切用款。酌從刪減。以崇節儉。○又諭。前因純堪奏。叅司員龍光辦事荒謬。載鋼景霖均未會銜。當諭令載鋼。景霖會同純堪據實具奏。茲據載鋼等會查覆奏。此案載鋼面委郎中龍光清查官當。並准其私帶平民白天瑞等前往。又不與純堪等

商酌辦理。實屬輕率。純堪以龍光辦事荒謬。具摺奏參。既知係應行會銜具奏之件。並不將奏底與載鋼等商閱。亦有不合。均著交宗人府議處。景霖於載鋼面委龍光清查一事。隨聲附和。亦屬非是。並著交部察議。郎中龍光將當務帳本攜至私宅。並帶該當辭出之人。以致物議沸騰。且於所遞稟帖一件。呈銷自便。實屬任意妄為。著交部議處。○予因公淹歿。江西典史胡紹寅祭葬卹廕。○予浙江各屬殉難生員沈啟曾等紳民婦女一百五十名口。分別旌卹如例。並予建祠。○已已。

上復詣

大高殿祈雨壇行禮。○遣惇親王奕諒恭祀

天神壇。恭親王奕訢恭祀

地祇壇。鍾郡王奕詒恭祀

太歲壇。睿親王德長詣

關帝廟。鄭親王承志詣

城隍廟。惠郡王奕詳詣

時應宮。禮親王世鐸詣

昭顯廟。貝勒載治詣

宣仁廟。豫親王義道詣

凝和廟。肅親王華豐詣

覺生寺。怡親王載敦詣。

黑龍潭。賽因諾顏親王達爾瑪詣密雲縣。

白龍潭。拈香。○諭內閣。前因京師入春以來。糧價昂貴。貧民覓食維艱。疊經降旨。將普濟堂功德林二處粥廠。從清明後展限兩箇月。五城十五飯廠。於三月十二日後展限兩箇月。現值青黃不接。雨澤愆期。小民苦累情形。尤為可憫。自應加恩調劑。以恤窮黎。所有五城十五廠及普濟堂功德林等處。均著加恩。按照前限。再行展限兩箇月。卽著戶部趕緊籌款。發交五城御史接辦。該御史等務當督率司坊各員認真稽查。俾小民均霑實惠。如查有胥吏等從中私易米石。剋扣侵

漁。著卽從嚴懲辦。其長椿寺等處粥廠。並著各該御史會同各紳士寬籌經費。妥為施放。至內城地面。並六城門外。應如何開設粥廠。接濟民食之處。著順天府府尹察看情形。迅速具奏。候旨施恩。○諭軍機大臣等。丁寶楨奏。賊眾搶撲運河。現由汶上進勦。並嚴布黃防一摺。捻蹤由豫入東。從鄆城梁山間道。直撲沈口。官軍鏖戰不支。該逆於戴廟水洞處。衝突過河。分為兩股。一股屯踞戴廟。一股屯踞三里莊。省防喫重。丁寶楨已帶王正起等營。由汶上一路迎截。著卽催調王成謙等合力追勦。力顧省防。東昌張秋等處黃防。著卽嚴飭龔易圖等認真防範。並飭濱黃各州縣嚴查渡口。將船隻盡行

提歸北岸以杜北竄。儻有疏失，卽以軍法從事。丁寶楨於運河防務未能得力。雖因河水旱涸，究屬籌策無方。著交部嚴加議處。總兵王心安著卽革職，暫免治罪，仍留營效力，以觀後效。儻再不知愧奮，卽行從嚴叅辦。都司朱萬美於認守地段不能遏賊，致壞全局。著卽於軍前正法，以昭炯戒。其餘陣亡文武員弁，著丁寶楨查明具奏。李鴻章仍駐周口，鞭長莫及。著卽移營東境，擇要駐紮，居中調度。劉銘傳、潘鼎新等軍均落賊後，著該大臣卽行催令迅速赴東，力圖勦辦。徐州一帶防務，著飛咨曾國藩、張之萬、速調黃翼升到防，以資得力。宋國永等一時既不能西進，著卽酌量檄調，並於河南防軍

內嚴飭布置，以防回竄。劉長佑現在已否回省，著卽飭令張樹聲專辦大名一帶防務。河間、景州等處為直東往來要道，著督同唐訓方挑兵赴防，毋稍延誤。並著崇厚將天津洋槍隊挑選精銳，並籌度就近可調之兵，聽候諭旨調遣。由該侍郎督帶防剿。劉長佑、崇厚均當多發偵探，妥慎籌備，毋稍大意。將此由六百里加緊各諭令知之。尋吏部議：丁寶楨應照不應重公罪降二級留任例上加等，降三級留任，不准抵銷。從之。○以甘肅涼州等處勦匪出力，賞都司錢魁元等花翎。知縣孫有繹等藍翎。餘升敘開復有差。○庚午。上以夏至祭。

地於
方澤自是日始齋戒三日○辛未
上詣

皇史宬

文宗顯皇帝實錄

聖訓前行禮○諭內閣宗人府奏審明載燾等呈訴莊親王府欠分租銀請旨辦理一摺莊親王府前於道光十八年間因長房養贍無資奏定每月分給奕勳等五房藍甲五十副每年撥給地租銀五千兩欽奉

宣宗成皇帝諭旨允准嗣因該王府租項未能催齊以致歷年

短給乃載燾等並不依據情理輒敢任意肆言不知檢束情殊可惡宗人府請將載燾等分別議處懲責猶不足以蔽辜奉恩將軍載察效力筆帖式載雕載雕學長筆帖式綿杰均著卽行革職交宗人府與閒散宗室載燾載納一併從重板責以示懲儆惟該王府因欠分租銀屢被控訴實乖敦睦之誼卽著遵照道光年間奏定數目每月撥給藍甲五十副並著莊親王奕仁照原分五千兩租銀地畝兌給載燾等五房自行催取租銀呈報該衙門存案以息訟端而昭和協○諭軍機大臣等有人奏江蘇長洲令崩德模於部定漕糧折價浮收甚多與已革漕書徐海珊結拜師生與徐佩瑀結為兄

弟種種庇護各等語。該縣為省會首邑。瘡痍之後。正當竭力撫恤。培養元氣。若如所叅各情。拊克聚斂。無所不至。何以重民命而肅官常。著曾國藩。郭柏蔭。按照所叅各款。徹底查明。據實覆奏。原片著鈔給閱看。將此各諭令知之。○又諭。左宗棠奏督軍分道入關一摺。劉典。唐協和等軍。與鮑超所部。在鄂省分路擊賊。左宗棠亦親為策應。將賊疊次擊敗。偏出鄂境。現在逆股業已竄至東境。左宗棠正可迅速入關。專辦張總愚一股。該匪屢為陝軍痛挫。逆燄已衰。左宗棠入關後。與劉松山等軍。會合夾擊。務將此股就地殄除。不可令其竄入鄂豫。又成蔓延不了之局。昨據庫克吉泰等奏稱。擒匪被官

軍在附省一帶擊敗。又復渡渭北竄。逆騎飄忽異常。劉典一軍。仍當由荆子關趨赴藍田。以防陝捻回竄武關之路。毋稍大意。另片奏。覆陳勦撫回匪事宜。與喬松年前奏大略相同。回民亦係朝廷赤子。斷無盡行誅戮之理。惟其中積悍匪徒。必先勦盡。始可將良回分別招撫。尤須另籌曠土。妥為安插。毋令與漢民構釁。方可久安。所稱責令良回縛獻逆回。並令其導引官兵。尋蹤勦捕。俾漢民稍蠲夙忿之處。辦理頗合機宜。著俟入關時。與喬松年妥商籌辦。將此由六百里各諭令知之。○又諭。玉通奏。籌款撥發蒙古俸銀。請飭山西將未解俸銀。迅速解滙。並番賊擾害蒙古各摺片。青海蒙古王公貝

勒等應領俸銀。積欠至三年之久。該處疊次被匪滋擾。蒙古生計維艱。若不將積欠俸銀量為籌發。不足以示體恤。所有由晉領到餉銀一萬五千兩。除歸還商民借款等項外。下餘銀一萬八百兩。卽著照玉通所請。先提銀九千一百兩。暫為墊發。該蒙古王公等一年全俸。以資餬口。所餘銀兩。著俟山西湊借一年全俸銀兩解到時。再行湊還提借等項。如有不敷。俟續請撥餉。再為歸款。據玉通奏稱山西湊借一年全俸銀九千一百兩。接准山西巡撫來咨。已於上年二月委員解赴歸綏道衙門轉解。何以至今尚未解到。著趙長齡查明行抵何處。飭令迅速解往。毋任延玩。其餘未解俸銀。並著該撫

隨時籌撥。察漢諾們罕旗番子逃往他受族番。句通外黨。搶掠扎哈細里地方。傷斃蒙古台吉等多人。實屬不法。已極。著玉通嚴飭該鎮道廳營暨該盟長等。認真躡緝。務獲究辦。毋稍寬縱。將此由四百里各諭令知之。○又諭榮全奏籌畫安插索倫等眾。並棍噶扎勒參欲赴俄國一摺。索倫蒙古人眾。效力最久。實為國家忠義世僕。豈可任其淪落異域。前諭該參贊務當設法接出。斷不可吝惜小費。現在烏里雅蘇台雖無曠地可以安插。或於接出後。令其在科布多暫住。再酌量請旨。以為安插之計。棍噶扎勒參欲赴俄國。所論不為無見。惟蒙古兵丁賴其統帶。此時李雲麟既不前進。棍噶扎勒參

留為鎮撫。著毋庸前往。所有籌辦安插索倫蒙古等眾事宜。著榮全會商妥辦。儻經費不敷。並著隨時奏聞。將此由六百里諭令知之。○烏魯木齊提督成祿奏。遵查安玉一帶。現無賊蹤。哈密城池。經巴里坤兵勇收復。該逆已返烏魯木齊故穴。肅州賊勢愈蹙。王仁和一軍。即令移紮近城西南。聯絡合圍。得旨。肅州賊勢既蹙。著與王仁和一軍。迅籌攻圍。毋得日久淹滯。○賞烏里雅蘇台參贊大臣貝勒錦丕勒多爾濟紫纒。○添鑄吉林管庫主事鈐記。補鑄福建漳州府經歷儒學。龍溪縣知縣。南靖縣。永豐鎮巡檢。各印信。從署副都統富爾孫。護巡撫周開錫請也。○壬申。諭內閣。工部左侍郎黃傳著

照料鍾郡王讀書。○諭軍機大臣等。前據額勒和布等奏。游民私墾禁地。呈請升科。請飭集議。並陳與將軍都興阿等籌商兩歧各摺片。當派恭親王會同大學士六部九卿議奏。並令奕榕會議。茲據王大臣等奏稱。盛京附近一帶。沃壤荒山。歷屆未敢輕議開墾。而邊荒地闊。防檢難周。現在所墾地畝。僅據何名慶等供稱。已有數百萬畝。此外尚不知凡幾。必須徹底查究。庶已墾之地。可以覈實清釐。未墾之地。仍當示以限制。請派王大臣前往。會同察勘。請旨辦理等語。著派都興阿。延煦。額勒和布。奕榕。恩錫。揀派明白曉事熟悉情形之員。逐一詳加察勘。並著延煦。恩錫。奕榕。進山查勘。如果審時度

勢不能不俯順輿情。所有一切應辦事宜。應如何詳定章程。俟查勘覆奏到時。再降諭旨。其有關風水者。仍當封禁。不得妄議開墾。至東界朝鮮地方。有無窒礙。自當妥籌撫綏。俾該國猜疑悉泯。著禮部行文該國。告以遠行驅逐。恐失業匪民。轉致騷擾該國邊境。且該國邊境民人。亦難保無潛行越界。私墾情事。令其先行詳查。或擬作何安插之處。迅速覈覆。一面俟延煦等查勘定議後。再行酌度辦理。都興阿等務當宣示朝廷格外恩施。不咎其既往之愆。仍予以謀生之路。至該省歷任將軍。及各部曾經查勘侍郎。朝廷寬大之恩。既概恕其失察。此次查辦各員。務須籌畫萬全。嚴定章程。加意防範。

以期一勞永逸。並檢查吉林五常堡升科成案。通盤籌畫。朝鮮沿邊情形。亦著就近察看具奏。何名慶等四人著帶同前往。酌度妥辦。原摺均著鈔給閱看。將此各諭令知之。○命候補庶子章鋆仍在上書房行走。

大清穆宗繼天開運受中居正保大定功聖智誠孝信敏恭寬
毅皇帝實錄卷之二百三



